



Dartigne, afresc inte glesie dal borc di Clama

la puritât ti deve

*fastidi / parcè che tu savevis ce tant impûrs che o sin / cuant che misturìn i
siums di ogni vilie. / e ce tant che nus pese intelet e judizi, / e il metisi
in forsit*

(“Cotidianas” 1978, Mario Benedetti, Uruguay, 1920-2009)

ma al è sporc, il purcit! al rime te cragne, al gjolt tal
pantan. i ruspis istès e san che di lui « no si bute vie nuie » (e disin cussì
ancje chei di citât, aghegole intai voi). ma si cjate des talpis come chês dal
demoni! cualchi religjon e rive fin a proibî di nudrîsi parie. no la nestre, in
sens gjeografic, che su chel cont e à cjolt sù liendis antighis, voltantlis in
favôr di orele. e di rendite. da rest e veve fat cussì ancje cu la fieste dal *Sol Invictus* benzà
celebrade il vincj e
cinc di Dicembar: i à cambiât dome non.
ve alore rivâ dal Egjit un om in vene di sant: Antoni di
non. ma no chel di Padue: chel altri, l’abat numar un. lu cjatìn ca mo là, tor

pal mont [1]

. lui al cjate un purcit clopadiç: lu vuaris. e chel i va simpri daûr. ancje il fi dal re al sta par murî. al vuaris ancje lui e la innomine e côr [2].

in chei timps al coreve inmò plui il *fûc*

dal Infier (vuê clamât *herpes zoster*):

une malatie de piel fate di un fonc stabilît intes farinis. il sant om al fonde

une comunitât di muncis par curà chei malâts, cul saîn. cussì chel *fûc* al ven batiât *di sant'Antoni*. e lui al merete il dirit di tirâ sù purcits: libars

di zirâ tal païs. une fasse tor de panze e une campanele tor dal cuel: nudrîs

dai vilans (a gratis: il vot par mil di chê volte). e vuai a fâur dal mâl. lui

invezit, puaret, al è tentât dal diaul [3]

cun aspîet di feminis dispetoradis. e chel Toni al ten dûr, maraveant une

schirie di lôr che an piturât di ogni bande chê brute soference [4].

par fortune, la femine vuê no je plui segnacul di pecjât: tantis voltis nome di beade, apaiant, perdizion. benedete!

secont i scuelâts di bande confessionâl, la imbinade *sant/purcit* e vûl dî sotanance dal *mâl* ae *fede*. secont chei altris, e resurîs figuris di cults vielis, cuant

che al puest dal purcit al jere un cenglâr.

da rest a Dartigne, inte glesie dal borc di Clama, si viôt

un afresc, cu la figure di un purcit biel pelôs, cun tante di fasse. Ben! al è

deventât segnacul de sagre clamade *Purcit*

in Staiare

che la fieste e scomenci ...



il cjâlçumit

al è inmò dut scûr cuant che al rive l'Ivan cui curtis inte
sporte. lu spietin biei pronts cule aghe bolint e la bale di stranc. la bestie e
talpete slungjant i soi vuics fin tal cîl e sot tiere. tal seglot e finis,
intun scjas plen di sanc, la sô vite spadade.

nissun al à dûl dal so murî zovin, a doi dôs di dizun [5]

che tache la fieste e al è ce mangjâ di cjolisi la voie. par vuê. e proviste dilunc
dal Invier. mule dolçute, salam di cicinis, luianie e muset par cuinçâ la
broade. po salam e persut, saîn e pestât, la cope e l'ardiel. di bande la
medole, par onzi i stracuei. i fruts no an padin par chê novitât: di podè
mangjâ vonde, savint che e ven une volte ogni tant. cussì chel dì al reste in
ponte di lenghe, fintremai l'an cu ven.

tant che un vescul vignût di lontan a sintî se savessin

dutrine, a chei mûi ur domande cuâl sedial stât plui il dì biel de lôr vite...

(si capis che al voleve dî chel, che bielzà ducj a vevin passât, de lôr comunion).

ma nissun no si olse a vierzi il bec in conferme.

po un Celòt dut sigûr al rispuint che je stade chê dì che jù

a cjase e an copât il purcit. no la mighe ridût chel bon pari pastôr: lui nol à
mai savût ce che fos une fan.

benedet il purcit.

e la purcite ?

e cambie sens dispès [6].

« *cjapâ la purcite* » par dî un rimiedi tentât par nuie.

« *fâ la purcite* » invezit

e jere (ancje) une *strambetât* par

comunicâ, cence gazetin. cuant che doi, morôs o maridâts, a decidevin di molâle
li, i amis lu pandevin al mont. di gnot: lassant jù une striche, cun cjalcine e
pinel. su la strade: fra cjase di lui e di jê. o contrari. rimarcant su lis
colpis di une o chel altri, secont il parê di une bande o chê altre. setemanis
di peteçs.

mancjant la cjalcine (e costave)

la materie prime plui a bon marcjât al jere il ledan (e ogni famee e veve il so ledanâr ...

dal Passadôr

[1] secont un scrit dal cuart secul di sant Atanasi, ampliât po di sant Jaroni.

[2] Aymar Falco, *Antoniae Historiae*, 1534.

[3] secont la conte dal secul decim tierç, fate di Jacum di Varagine, inte opare *Liende di Aur*.

[4] come Hieronymus Bosch, Matthias

Grünewald, David Teniers el Zovin, Bernardo Parentino, Odilon Redon, Paul Cézanne, Max Ernst, Salvador Dalì. e ancjemò tancj, tancj altris

[5]

dâi di mangjâ, in chê prospetive, al sarès stât un straçâ.

[6] viôt

ancje *divignî*:

<http://www.contecurte.eu/2013/07/divigni-1-di-la-di-darwin-2/>